

曉讀書齋雜錄

曉讀書齋三錄卷上

黔中錄

幽冀之境有水皆名爲海吳越之地有水皆名爲河至黔蜀之區有水又皆名爲江故貴州一隅江之名有數十類皆小水也邛笮以筏索得名漢書武帝紀注西南夷循笮以渡水因號邛笮是也牂柯郡以船杙得名華陽國志莊嶠伐夜郎軍至且蘭牂船于岸而步戰旣滅夜郎以苴蘭有椽船牂柯處乃改其名爲牂柯是也禮記中庸篇言聲名洋溢必首及舟車所至信哉樊說文健爲夷也从人棘聲蓋在坤地頗有順理之性元和郡縣志云戎獠之中最

有人道故字从人然玉篇又云屏之遠方曰𦵏𦵏之言偏也則又諧聲之字非指事矣

宋書州郡志武陵郡黠陽長二漢無晉太康地志有按諸地志皆以爲吳分酉陽縣疑黠陽卽黔陽以音同而轉也說文黠淺黃黑也黔黎也秦謂民爲黔首謂黑也徐鉉二字並音臣淹切蓋古字通

方言毳朝鮮冽水之間曰葉禴郭璞云今短度絹爲葉禴也漢書地理志益州郡有葉禴縣或亦以織毳得名

犛牛西南夷長尾牛衆經音義引說文以爲卽今之貓今攷說文無貓字止作貓玉篇廣韻貓獸捕鼠也犛貓音同爾雅云虎竊毛謂之號貓是貓可以名虎亦可以名牛矣

銅柱灘爲延江水入江之處土人云馬援始欲鑄銅柱於此故名樂史引周地圖記曰涪陵江中有銅柱灘昔人於此維舟見水底有桐柱故名今攷水經注本作桐柱灘則前一說皆附會也

後漢書西南夷傳桓帝時牂柯郡人尹珍自以生於荒裔不知禮義乃從汝南許慎應奉受經書圖緯學成還鄉里教授於是南域始有學焉珍官至荊州刺史今攷說文及後漢書儒林傳慎卒當在安帝建光之初下距桓帝時尙二十餘年不得云桓帝時慎尙在也惟貴州圖經云珍學成後歸鄉里至桓帝時官至荊州刺史較得事實

又按華陽國志尹珍母劍人今遵義府綏陽縣東王草里

有尹珍講堂豈綏陽卽漢無劍縣地乎

竹三王郎祠在今平越府黃絲驛與牂柯江相近後漢書西南夷傳所云夜郎侯生於邛水卽此蓋遵義平越都勻等府皆古夜郎國地漢書所云夜郎東接交阯西鄰滇國自西徂東奚啻千里是也今人皆以唐所置夜郎縣爲夜郎矣又攷遵義府在今貴州北境而通典云播州爲夜郎國之東南隅又可知夜郎之大矣

水東水西以烏江分貴州土司傳安氏領水西宋氏領水東是也水內水外以三岔河分貴州紀事陸夢龍等諸監司分駐岔河共翦水 逆苗是也明天啓六年巡撫王璠等拒安邦彥於趙官堡殺傷甚衆水外之賊一時潰歸

丹江在丹江通判城西合諸山之水以成江下流合台拱小江入於清江按沿江諸苗又有大丹江小丹江之別實止一江也

施秉縣本與清江接壤明萬歷中清江叛苗結連播州楊應龍爲寇四出焚掠乃遷施秉縣治於偏橋以避之雍正十年台拱苗渡江焚舊施秉縣卽萬歷前故縣址也

貴州四川以赤水河爲界明史四川土司傳蘭州平總督朱燮元請以赤水河爲界河東龍場屬黔河西赤水永寧屬蜀迄今遵之

都江又有上下江之分由諸葛營而西爲上江由諸葛營而東爲下江今設有上江營古州協副將主之下江則設

通判治焉

牛皮箐在新疆之中綿亘數百里不一其名丹江雞 在  
其北古州上江在其南八寨九門在其西南清江台拱在  
其東北爲生熟苗逋逃之藪乾隆元年因逆苗包利紅銀  
等叛經略張廣泗遣兵四面進勦窟穴始空然其境陰霾  
布地黑霧障天近年鎮遠鎮遣一外委及五兵戍之數月  
間皆爲暴雷震死蓋沱所鍾洵非人境矣

貴州初建會城本擬在安順後以秤秤貴陽之土較安順  
重十之三是以移建焉

古州氣最溫和二月未中百花齊放溶江車 流其北飛

山擺山峙其西余與彭軍門廷棟孫司馬鑑御袂衣坐諸

葛 尙覺暖氣馥郁低瞻廡宇翠歷千層東望郭門花黃  
十里覺江鄉春景無此繁麗也

甲秀樓在貴陽府城南芳杜洲上文端公鄂爾泰雍正中  
平苗至此有石刻一絕句云炊煙日午散如絲十萬人家  
飯熟時問訊何人稱濟火斜陽滿樹武侯祠蓋樓傍卽諸  
葛忠武祠也俗傳濟火爲安氏始祖佐忠武征孟獲有功  
故土人以之配食然此事究未知所出田雯作濟火考以  
爲苗人相傳云殊不足據今明史貴州土司傳始載入濟  
火事當亦據萬歷中所修貴州通志耳

通志言蜀漢封濟

云濟火爲亮先鋒其說皆不經按舊唐書南蠻傳會昌中  
封鬼主阿佩別帥爲羅甸王是唐時始有羅甸王之名

貴陽府與遵義府以烏江爲界平越府與遵義府又以渭



河爲界明史貴州土司傳播州平分其地爲遵義平越二府以渭河中心爲限按渭河僅小水在黔西州境流合以濟水始入烏江當時以爲界者蓋是水適當二府之中耳余癸丑四月自大定按試遵義會過此水水上有橋亦名渭水橋有絕句云渭河北去路尤稀急湍橫衝石徑微二十二條衣帶水劈空爭欲上山飛蓋水盛時渭河尙有洶湧之勢也

又按銅仁縣亦有渭水故唐涇陽縣以此名與此自別飛雲洞距黃平州二十里在官道旁是以競傳其勝余以爲尙不及天柱縣之師子厓開泰縣之少寨諸洞惜地甚癖阻惟學使三年一過此然尙須舍輿而騎舍騎而步僅

乃得過則山之奇險峭厲可知

諸葛洞在施秉城東十里石檻三重縣漏百仞余棹小舟過之未到數十步已飛瀑及額矣厓昏接天水激冒嶺久佇之懍懍乎似非人境

沅湘之間祀馬伏波鎮遠以西則祀諸葛均屬報功之典然近日貴州又甚重黑神香火報賽不絕云神爲唐南霽雲則神與地殊不相涉并未知所以號黑神之故

自獨山州三角屯舟行至古州約水程三日卽古豚水也亦名牂柯江漢武帝元鼎五年伐南越發夜郎精兵下牂柯同會番禺卽此水余以甲寅二月自都勻按試黎平道出於此灘奔似箭石轉如星或魚躍高厓或花生天半蠻

中之景奇麗極矣

自畢節至四川永寧今已爲通衢運鈔往來皆由此道明

貴州土司傳自永寧而普市而霑泥

朱燾元傳作靡泥而四川土司傳亦同

赤水百五十里皆坦途赤水有城郭可憑而守又四十里爲白巖六十里爲層臺又六十里爲畢節畢節至大方不及六十里按今圖經云畢節至永寧二百五十里實不止也當以明史爲準他若靡泥普市隨時而改不可悉考惟層臺廢站尙有遺址耳

乾隆六十年正月湖南逆苗吳華登石三保鉤結銅仁石柳鄧等焚劫附近諸寨大學士公福康安時總督雲貴會四川湖南北兵勦平之按明貴州土司傳宣德五年銅仁

長官石各野聚衆出沒銅仁平頭甕橋諸處誘脅蠻賊石  
雞娘并算子平長官吳畢郎又有吳不爾吳不跳等共爲  
亂亦彙川湖貴州進勦乃平今相率煽亂者又此二姓蓋  
其種類實繁屢經誅勦尙不能盡耳聞吳華登誑惑諸苗  
以爲逆藩吳三桂之後不知明時長官卽有此姓且吳逆  
又安得尙有後人耶

按明成化十一年銅仁烏羅苗在全  
州妄稱元末明玉珍之子孫經官軍

討平之亦與吳華敦  
詭稱吳三桂後相類

思南府治西明一統志云有漢牂柯郡廢通志府志皆因  
之實非也攷兩漢牂柯郡皆治苴蘭若思南府治則爲漢  
武陵郡西陽縣地安得云漢牂柯郡在此乎蓋唐武德二  
年別立牂柯郡或當是耳太平寰宇記牂州牂柯郡下亦

云有古牂柯郡城在今郡西漢未之時所保於此說亦未諦

華陽國志云牂柯郡上當天井故多雨潦今諺云天無三日晴又目之爲漏天亦以此余居此三年近秋冬間亦有晴至十日者土人卽詫以爲異今攷漏天二字亦始見華陽國志

貴州名宦宋元以前僅止數輩然其功德在人典籍可稽者尙不乏人今約舉之以待有心者補入祀典焉三國蜀志馬忠傳拜忠牂柯太守郡丞朱褒反叛亂之後忠撫育卹理甚有威惠張嶷傳注引益部耆舊傳牂柯與古獠獞復反馬忠令嶷領諸營往討嶷招降得二千餘人悉傳

諸漢中費詩傳爲牂柯太守李恢傳爲庾隆都督追朱褒之黨南至槃江東接牂柯南土平定恢軍功居多晉書載記李壽遣鎮東大將軍李奕征牂柯太守謝恕恕保城距守者積日不拔會奕糧盡引還元和郡縣志思州思王縣下云漢時陳正爲牂柯太守阻兵保據思邛水漢將夜郎王破正於此安撫百姓時人思慕遂爲縣名太平寰宇記費州下云後周宣政元年信州總管龍門公王述招慰生獠王元殊多質等歸國遂肇立爲費州也又云唐武德四年山南道大使趙郡王孝恭招慰生獠置城樂縣始築城時人歌樂之遂以爲名以上諸人或有戰功或畱治蹟於蠻方有裨卽於吏績無慙願核實入之以勸後來云

貴州人物亦有可補入太平寰宇記漢建安中涪陵謝本  
以涪陵廣大白州牧劉璋分置丹興漢髮二縣晉書載記  
涪陵民藥紳起兵應羅尙又寰宇記云周保定四年涪陵  
首領田思鶴歸化因置奉州後改爲黔州又云唐貞觀中  
東謝首領謝元深南謝首領謝彊又首領謝汕謝文經杜  
佑通典西趙首領趙唐圖經牂柯酋長謝龍羽唐貞觀三  
年授牂柯刺史封夜郎公

此條寰宇記亦同

按自漢建安至唐貞

觀謝氏皆世爲渠率則亦涪陵之巨族矣

遵義府城東有桃源洞俗傳爲李白長流夜郎所居之地  
有石刻聽鶯詩通志縣志皆錄入之無論詩之鄙俚必非

白作

白外集全  
集並無此

卽以輿地考之唐初有三夜郎一屬夷州

尋省在今綏陽縣界一爲業州治在今湖廣沅州府界後改名蛾山一貞觀十六年開山洞置兼置珍州今廢州及縣皆在桐梓縣界並與今遵義縣無涉是白曾到遵義與否尙無確據詩之工拙又可以不論

太平寰宇記引蜀志蜀先主於武陵五溪立黔安郡今攷黔安郡之置在隋大業三年安得三國時卽有黔安郡之號黔安郡蓋涪陵郡之誤下云永嘉後地沒蠻夷益可見係涪陵非黔安也圖經引舊說樂史引亦同蜀先主以地控涪江之源故於此立涪陵郡涪陵郡後周時改爲黔州隋又改黔安郡樂史因此誤也

樂史又云黔州在漢爲武陵郡酉陽縣地武帝於此置涪



陵縣是則涪陵縣係分酉陽縣所立而別屬巴郡也向讀  
元和郡縣志黔州理彭水縣乃於黔州下云本漢涪陵縣  
理於彭水又云本漢酉陽縣地一地兩名常以爲疑今始  
豁然蓋吉甫一本舊所隸而言一本分隸後言之欲讀者  
互見也樂史於地理雖不精而采掇極廣此等蓋皆係賈  
耽四夷縣道述等舊說樂史采用之耳

今酉陽州黔江彭水等縣皆漢涪陵縣地永順府永順龍  
山思南府安化婺川等縣皆漢酉陽縣地壤本相錯故前  
人云漢酉陽縣極大也

思邛水出思邛山今思邛山無可攷

前漢武陵郡治義陵縣後漢移治臨沅劉昭注郡國志引

潘京之說郡本名義陵在辰陽縣界與夷相接爲所攻破  
光武時移東出遂得見全

傳曰止戈爲武高平

曰陵於是改名焉昭以京說爲非余按前漢郡治義陵則  
京說亦未爲無據但郡名之改當在前漢時至光武中又  
移郡至臨沅京不分別言之故

劉昭之疑耳

今銅仁府  
卽辰陽

舊唐書吳分酉陽置黔陽郡隋於郡置彭水縣按吳未嘗  
置黔陽郡蓋縣字之誤耳樂史誤亦同

漢夜郎縣所在今已無攷惟舊唐書地理志珍州夜郎縣  
下云漢夜郎縣之地

今縣字  
誤作郡

據此則漢故縣亦當在今遵

義府境內但漢時縣大不知其境何所界耳

玉篇邵營縣亭名今不知所在

遵義府卽唐播州也韓退之云播州非人所居然以今日  
論之入遵義界卽山勢開展水田平曠實爲貴州十三府  
之最江浙人遷居此者頗多蓋已皆指爲樂土云

曉讀書齋三錄卷上終

曉讀書齋三錄卷下

陽湖洪亮吉著

塞外錄

唐書王方翼傳爲庭州刺史與十姓阿史那車簿較戰伊麗河按唐庭州治後庭縣後改金滿縣卽今古城距伊麗河尙遠蓋轉戰所至也

熱海當卽今烏魯木齊之布爾噶布拉克台站西之湯海西域聞見錄周百餘里中皆飛灰置物於中則燄起頃刻灰盡

固原州度六盤山山甚險峻東西咫尺顯晦頓殊古以此爲隴山之尾漢書地理志北地郡有略畔道卽此也小顏

云有略畔山今在慶州界其土俗呼爲洛盤音訛耳水經注又謂之六盤口今名曰六盤山實一山也十道志亦云樂蟠縣本漢略畔道地今西寧府卽漢金城郡臨羌破羌等縣地後魏初於此置鄯善鎮後又改置鄯州唐宋皆仍其名蓋破羌縣本繫破鄯善時所置其地或置鄯善降戶故名趙充國傳等可證故又名爲鄯善鎮又名爲鄯州也漢破羌故城在今碾伯縣西

過安西州行一百里有泉土人名爲疏勒泉余時已疑漢疏勒國在龜茲之西去長安已及萬里安得此間卽有疏勒泉車中無事因取漢書西域傳與耿恭等傳細校之而知恭所屯之疏勒城實非漢疏勒國所都之城名偶同耳

前漢書西域傳疏勒國治疏勒城後漢書傳云疏勒國領戶二萬二千勝兵三萬人於西域中爲強國則都城內既有王又有疏勒侯擊胡侯以訖右譯長等官旣不一加以居民勝兵自不下數萬何以棄而不居反畱空城爲恭等一二千人所據若云與疏勒國衆同城則匈奴車師不圍恭等并圍疏勒國君民矣匈奴旣於城下擁絕澗水則一城之人必皆大困恭卽能穿井得水疏勒國衆又將何飲乎恭卽能煮弩作食疏勒國衆又將何食乎且西域諸國類皆逐水草而居今城旁之泉寬止二十餘步不足以供十數萬衆飲汲及畜牧明甚況自圍城及圍解傳不涉疏勒國一字明非疏勒國都城可知一矣二則地理遠近

不合恭傳言恭爲戊校尉屯金滿城謁者關龍爲己校尉屯柳中金滿城卽今奇臺縣東之古城柳中縣在今哈密城西十里皆與今州西之疏勒泉近而與漢疏勒國遠至二倍圖經古疏勒國去陝西省九千六百里今鎮西府去陝西不及五千里古城在府西不及五百里二矣三則日月遲速不合恭傳言肅宗建初元年正月秦彭等會柳中擊車師攻交河城自柳中至交河城一往一返及攻城之日至少亦須一月及車師降後乃分兵使范羌從山北迎恭又大雪丈餘卽至速亦必半月可達圍解之後且戰且行吏士又素飢困然恭傳云是年三月已至玉門則道里甚近必非自疏勒國之玉門可知三矣又恭傳云發張掖

酒泉敦煌三郡及鄯善兵鄯 在今沙州衛西與三郡皆  
距今州西之泉密適當日必就近徵發四也四則南北向  
背不合交河城卽今土魯番在雪山之北今疏勒泉亦在  
山北而疏勒國遠在雪山之南若恭果據疏勒國城則當  
使范羌自山南迎恭何得反從山北此又一顯證五矣又  
與班超傳彼此情形不合超傳建初三年上疏言臣孤守  
疏勒於今五載自建初三年上溯至永平十七年方及五  
載校恭傳被圍之日正在永平十八年及建初元年且超  
傳永平十八年帝崩焉耆以中國大喪遂攻沒都護陳寵  
超孤立無援而龜茲姑墨數兵攻疏勒超守槃橐城與忠  
爲首尾

卽疏勒國王

使恭此時在疏勒國都城正可與超往來



接應不慮勢孤而何以超傳既言孤立無援恭傳又云孤  
城固守明二人必不同在一國可知况一疏勒城也豈有  
龜茲姑墨攻其一面匈奴車師又攻其一面而兩不相聞  
者乎且恭果在此城是以喪敗之餘二三十人受四國迭  
攻恐亦無此理况鮑昱鄭衆認恭之功使圍城有四國正  
當張大其詞而何以一則言匈奴圍之歷旬不下一則言  
當匈奴之衝對數萬之衆皆僅言匈奴不及他國乎此又  
可準情酌理明爲必無之事矣至非疏勒國城而亦名爲  
疏勒者此亦如上郡之有龜茲酒泉之有玉門或居其流  
人或徙彼降戶皆未可定

疏勒水在安西左近於唐時又得數證新唐書郭元振傳

爲安西大都護會突厥娑葛陷安西四鎮路絕元振屯疏勒水上云云疏勒水近安西之顯證疏勒或又作娑勒李嗣業傳嗣業應募安西軍陷刀將時吐蕃兵十萬屯娑勒城據山瀕水又聯水作鄂云云瀕水卽疏勒水矣嗣業又嘗爲疏勒城使漢耿恭故井久涸嗣業禱已泉復出益可知卽恭所守之疏勒城矣

又據嗣業傳疏勒城旁又有信圖河今無可攷

金滿新唐書地理志等皆訛作金蒲近古城內掘得舊碑正作金滿蒲滿字形相近而誤亦如春秋左傳晉厲公名州滿釋文作州蒲又云一本作州滿是矣

趙充國傳道從沙陰地出鹽澤過長阬入窮水塞核窮水

塞卽今戈壁掘地至丈餘無水今自安西州至哈密皆是故云窮水塞也

涼州以西沙磧中皆出鹽其味較海鹽池鹽更美掃地卽可得之自涼州至伊犁皆然呂覽本味篇所謂大夏之鹽是也高誘註大夏澤名或云山名在西方卽指此

又本味篇所云不周之粟陽山之稌三危之露昆侖之井皆在西方足跡所經之地何得云流沙西北卽非人境乎今烏魯木齊伊犁所食之米穀粒大味甘尙勝中土

祁連山又名綦連山見北齊書綦連猛傳是綦連氏蓋以山得名

唐貞觀以後開元以前西南境最廣自今伊犁至西海皆

有州縣觀唐書蘇定方等傳可知定方傳爲伊麗道行  
大總管出金山破處本昆部進至曳咥河又薄金牙山與  
賀魯及十姓等戰擒賀魯於是修亭障列蹊隧定疆畛唐  
之州縣及於西海其明證也金山在今喀爾哈界唐書突  
厥傳頡利敗車鼻率所部竄金山之北是矣

距惠遠城南門一里有望河樓下瞰伊江爲遷客眺覽之  
所

果子溝山徑極險南北並高峯峻嶺中闢一道劣僅通人  
每歲雪深時往往連人及騎陷入雪中至三四月路開台  
員卽絡續報雪中檢出人馬屍骨其人尙皆僵坐馬背不  
仆蓋爲雪氣所逼也

伊犁大風至拔木土人云今歲尤甚余所居與撫民同知  
官廨相對廨中老柳一日拔去十數株其奔騰盪擊之聲  
怵人耳目

賽里謨淖爾在伊犁後三台間有島嶼無輪委不生一物  
不染一塵投以巨細頃刻必漂浮上岸余以冬夏過此  
水色皆深綠環以雪峰久視之覺心形俱澈土人稱爲西  
方淨海云中有神獸形似青牛大角而多髯見則雨雹  
布爾噶西淖爾在精河正北精河水入其中東西廣四百  
里南北百里常見蜃樓遙聞大礮聲則翌日大風  
精河水發時勢亦洶湧余以五月十日四鼓渡此時斜月  
欲落村雞亂鳴急浪中馬凡數歇乃得過

沙 南北兩路皆有之自巴里坤之精河其迤北一帶皆是齊七罕河在伊犁霍爾果斯城西

昂吉爾圖淖在烏魯木齊東南卽古鹽池也

戈壁中烏鵲皆穴地作巢其飲啄與內地雞豚無異

老聃未嘗入西域其以爲老聃入胡者釋氏欲引爲同道故神奇其說以炫世耳至葛洪神仙傳等并以老子爲十三聖師皆屬不經之談莊子云老聃死秦失弔之三號而出莊子爲老氏之學使老子果不死方將表其靈異肯反實其死耶水經注盩厔有大陵世謂之老子陵是老子之死既有弔賓復有葬地明生未出秦國境可知何云至西域耶今盩厔縣東南三十七里有樓觀或因老子休神之

所故爲之立觀也

元和郡縣志整屋縣樓觀本周康王大夫尹喜宅也周穆王爲召幽遠之人置爲道士相承至秦漢皆有道士云云余又疑之史記老子列傳云見周之衰迺遂去至關關令尹喜之著書以其時攷之當在春秋之末漢書藝文志關尹子九篇名喜爲關吏老子過關喜去吏而從之是喜官止關吏又與老子並時何得云周康王時喜已作大夫耶疑吉甫等亦采傳記之誤而未及細考也劉向列僊傳卽云關令尹喜者周大夫不言在康王時

葛洪書老子西遊遇關令喜於散關爲喜著道德經一卷魏崔浩亦云尹喜爲散關令李尤函谷關銘則云老子所

出爲函關張守節等亦云老子所出關或以爲函谷關今攷散關在整屋正西老子旣葬地在大陵似未嘗出散關且由周而秦則函谷爲必經之地疑函關之說爲是也洪云道德經止一卷亦誤

關尹子九篇據史記漢書則尹當是喜之官李尤函谷關銘及崔浩等所云則喜又似本姓尹然藝文志題云關尹子則以爲官名者是也因記老子事遂連類及之

因思人之所以意當道釋者以其長生不死也今老氏之非不死已見前矣至釋氏并不能長生涅槃等經云釋迦牟尼年未五十卽死隋書經籍志亦言釋迦在世教化四十九年是矣儒家之死釋家之所云涅槃圓寂也今秦隴一帶



佛刹皆塑臥佛皆係涅槃圓寂之形十大弟子皆在旁雪涕則所貴乎佛者果何在乎棄父母妻子不食肉飲酒而又不能長生則用心亦左矣今西域諸城郭又多塑歡喜佛皆男女露形作委瑣淫褻之狀其徒又皆尸祝之敬奉之不以為恥則其教又可以教淫矣

伊犁南山著名者一曰哈爾海圖產銅一曰沙拉搏和齊產鉛皆置廠採取

伊犁北山隨地著名一曰空鄂爾峩博在惠遠城北二十餘里勢甚莊嚴為伊犁之望臚於祀典產煤尤佳熱之即然宿之不滅一曰闕里善產金封鋼未開一曰索果產鐵置廠採取一曰塔爾奇乃往來孔道即果子溝也

伊犁河北凡九城綏定城塔爾奇蘆草溝清水河霍果斯  
皆在西北巴燕岱城盤子古爾扎皆在東南而大城居中  
爲總統將軍駐扎之所形勢尤扼要

新唐書突厥傳永徽四年罷瑤池都督府卽處月置金滿

州地理志北庭大都護府有金滿縣係實土而金滿府則

係羈縻州非一地也地理志又云金滿州都督府永徽五

二年爲府是金瑪瑙斯一城橫屆南北山往來至此者必

畱意稽察蓋

國家郡縣自此而止過是則皆軍台矣

未到瑪瑙斯四十里始見營房汎地蓋地已屬綏來縣故

仿內地十里一營房之制

伊犁河在惠遠城南亦名伊里河卽古伊列伊麗之轉聲也

弓日城當卽古弓月城之誤唐書突厥傳突騎施烏質勒  
攻得碎葉卽其牙居之誤碎葉川爲大牙弓月城伊麗  
水爲小牙 弓月城距今伊麗當亦不遠

關展在哈密西七百七十里其城北卽天山山東北有風  
穴故數百里內多怪風今攷晉書載記呂光大安二年光  
遣房晷至晉昌祀風穴據此則今關展卽十六國時晉昌  
又有高梧伊吾二關知今哈密其時亦當屬晉昌也

唐書吐蕃傳言莫賀延磧袤二千里無水草卽今安西州  
至哈密道也俗呼之爲戈壁

萬松塘在天山下卽詣巴里坤要道也細驗之實非松乃  
松心木耳說文玉篇等皆云栴松心木高誘淮南王書注  
栴讀如姓栴氏之栴今按左傳莊公元年楚武王卒於栴  
木之下卽此木陸德明釋文及正義並云有曼助二音蓋  
正義疑栴木爲朗榆故栴又有朗音也余己未冬遣戍伊  
犁過此曾畱一宿土人尙呼此爲栴木是矣又攷竟陵縣  
武來山一名栴木山樂史稱郡國志云楚武王卒於栴木  
之下卽此山玉篇又有武官莫昆二切今人亦皆讀作門  
哈密瓜卽古敦煌瓜也漢書地理志杜林以爲古瓜州地  
生美瓜小顏引舊注云卽春秋左氏傳所云允姓之姦居  
於瓜州者也其地今猶出大瓜長者狐入瓜中食之首尾

不出徐堅引廣志云凡瓜之所出以遼東廬江敦煌之種爲美瓜州大瓜如斛御瓜也然唐書地理志沙州瓜州等皆不貢瓜或以其生脆難致故不入常貢耳敦煌瓜亦有種皮薄而軟者出哈密回城等處大者如枕瓜熟時到口卽消融無滓其貢御者乃係未熟時生摘至熟則不能經久且不能歷遠道耳一種皮厚而脆者嘉峪關以內至甘涼一帶皆有之大者如斛食時須削去其皮其美亦不減哈密等所出地理志注所云瓜入瓜中首尾不出者蓋指此種耳

唐書地理志北庭大都護府貢阿魏今巴里坤烏魯木齊一帶皆有至土人亦呼爲押不盧價亦昂雪蛆則天山在

在皆有之

昆侖山出玉不特河源及葉爾羌和闐諸處也烏魯木齊  
巴里坤諸山亦皆有之余自哈密至巴里坤道出天山石  
色盡紺綠溫潤夜輒有光土人亦呼爲玉石

相傳溫都斯坦有石柱長數十丈上鐫寒門二字今攷淮  
南王書北極之山曰寒門高誘注積寒所在故曰寒門若  
今溫都斯坦則在正西已屆西海非北極也蓋偶同其名  
耳土人相傳又云寒門二字倉頡所篆益不足信

水經河水注渠犁城西北去烏壘三百三十里南與精絕  
接東北與尉犁接敦薨之水又南流注於河按今精河當  
卽昔之精絕以道里校之亦合精河今入布爾噶西淖爾

河河周廣四五百里當卽古之大河也

辛氏三秦記長安正南山爲秦嶺固矣圖經今在盩厔鄠縣界者爲終南山其自長安以東至藍田者爲秦嶺不知塞外之天山亦可稱爲秦嶺南史夷貊傳河南王其界北接高昌東北通秦嶺方千餘里蓋古之流沙地焉所云秦嶺卽天山也蓋天山本終南山之首是南山之首南山之尾皆可名秦嶺矣

楚辭大招魂乎無西西方流沙漭洋洋只魂乎無北北有寒山連龍輓只白 顛顛寒凝凝只連龍當卽天山之異名招魂則云魂兮歸來西方之害流沙千里些魂兮歸來北方不可以止些增冰峩峩飛雪千里些今出嘉峪關抵

伊犁七十里中實皆西而兼北戈壁之險雪山之寒或經旬而斷水或匝月而無人禦揭此二篇讀之真覺古今一轍也

齊語縣車東馬踰大行與辟耳之谿拘夏韋昭注拘夏辟耳之谿也是拘夏水名近太行山今攷水經注濁漳水下白渠水東南流逕邯鄲縣南又東與拘澗水合水導源武始東山白渠北俗猶謂是水爲拘河也拘河或卽春秋時拘夏何以言之水經注下云渚水東南流注拘澗水又東入白渠又東故瀆出焉一水東爲澤者曲梁縣之雞澤也國語所謂雞工矣雞澤旣爲國語之雞工則拘河亦卽國語時之拘夏也



春秋時有兩成一在濟陰郡成陽史記武王封弟季載於成卽杜預左傳注所云邾姬姓國周公弟邾叔處之後在東平剛縣西南應劭曰其後乃遷於成之陽故曰成陽成又作邾公羊又作盛穆天子傳有盛姬疑卽邾國之女也水經注洙水下云洸水西南流逕盛鄉城京相璠曰剛縣西南有盛鄉城者也亦卽此矣一在東郡廩丘說文邾孟氏邑从邑成聲水經注引京相璠曰東郡廩丘縣南三十里有成都故城魏王泰括地志亦同王莽所云成穀矣今考成縣故城在今兗州府寧陽縣北相近又有成城圖經成城在園陽縣東北九十里春秋時魯邑也城都故城成陽故城並在今曹州府濮州東南又考應劭誤以叔武爲

季載管蔡世家本云冉季載少未得封杜預又以叔武爲  
叔處或音近而誤

曉讀書齋四錄卷上

左傳宣公二年其御羊斟不與鄭

于斟爲人

姓名衆又云叔牂卽羊斟也正義申杜并云羊斟與叔牂當是名字相配今攷卽以羊斟爲人姓名則羊當是姓無緣作字與姓相配惟淮南繆稱訓載此事爲得其實云魯酒薄而邯鄲圍羊羹不斟而宋國危斟訓爲斟酌之斟方言斟汁也羊斟者猶言羊汁耳小司馬史記索隱云斟謂羹勺故因名羹斟是矣傳下云羊斟非人亦云羊羹細故而致敗國師故云非人耳猶戰國中山策所云吾以一杯羊羹亡國事絕相類況細校淮南魯酒二語句法大同若

以羊斟爲人姓名則魯酒二字亦可云人姓名乎高誘注  
第二云華元與鄭戰殺羊食士不及其御亦不以羊斟爲人  
姓名最屬得解淮南高誘皆在鄭杜之前說當有據也

龍門有二一爲江渚之龍門一爲河津之龍門江渚之龍  
門一名郢東門河津之龍門又一名凌門是也楚辭九章  
涉江云過夏首而西浮顧龍門而不見王逸章句云龍門  
楚東門也劉向九歎亦同以迄謝朓辭隨王牋白雲在天  
龍門不見隨王子隆時在荊州故朓牋云然至若河津之  
龍門名雖見於禹貢水經然文士相承用登龍門一語實  
始於辛氏三秦記而李賢注後漢書引之後漢書李膺傳  
士有被其容接者名爲登龍門賢注云以魚爲喻也龍門

河水所下之口水險不通魚鼈之屬莫能上江海大魚薄  
集此門數千不得上上則爲龍也自唐以後皆承用之於  
是人但知有河津之龍門而楚郢之龍門隱矣

又伊闕亦有龍門見

傳毅都賦及水經注此伊水之龍門也

費於春秋前蓋魯附庸國孔安國尙書費誓傳伯禽爲方  
伯監七百里內之諸侯帥之以征歎而敕之左傳隱公元  
年費伯帥師城郕伯蓋其封爵地近費故帥師城之否  
則或受命於魯合觀傳二年書法自明杜注言魯大夫非  
也史記魯世家釐公元年以汶陽鄆封季友蓋前此魯已  
兼費故至是以封友自此之後費遂爲季氏之邑矣費一  
作鄆又作柴皆古字通

史記仲尼弟子列傳顓孫師陳人今按左傳莊公十一年公以金僕姑射南宮長萬公右歆孫生搏之歆顓同是魯本有顓孫姓不必盡出陳矣兒子飴孫又云莊二十年左傳陳公子完與顓孫奔齊顓孫自齊來奔春秋時有以王父名爲氏如楚令尹鬥班齊公子橐堅之類子張或卽顓孫之後太史公從其先世之籍故曰陳人如孔子居魯而曰宋人是也說亦可通

晉宋書及南史隱逸傳皆列陶潛皆云爲大司馬侃曾孫余已有辯見前卷及集中陶氏族譜序矣今細核三傳不特此一事不可信也南史於著五柳先生傳下卽云親老家貧州召主簿不就遂抱羸疾江州刺史檀道濟往候之

及饋梁肉云云攷宋書本傳道濟拜江州刺史在文帝元  
嘉三年五月不及一年而淵明已卒今敘在淵明爲鎮軍  
建威參軍及官彭澤令以上一不可信也淵明此時年出  
六十久已無親

淵明與子書卽云年過五十而窮苦而云  
荼毒則五十以前親已久亡可知

親老家貧二不可信也於此條下始云義熙末徵爲著作  
佐郎是以宋之元嘉爲

晉義熙以前前後倒置三不可

信也玉弘爲江州反在道濟之後四不可信也顏延之傳  
爲後將軍劉柳行參軍因轉主簿皆在義熙十二年前至  
爲始安太守則在宋少帝景平中契闊十年誅所云自爾  
介居及我多暇以下十數句是也是淵明始終交契無過  
延之然敘淵明家世祇云南岳之幽居者也又云物尙孤

生絕不及其先世而三傳皆云系出於侃與其信异代之  
史臣不若信生平之知已是傳所云自以曾祖晉世宰輔  
恥復屈身後代云云五不可信也宋書南史並云義熙未  
徵爲著作佐郎而誄則云詔徵爲著作郎下卽云春秋若  
干以元嘉四年月日卒今細校之以著作佐郎徵在義熙  
之末以著作郎徵則在宋受命以後實係兩事故官階正  
佐亦不同此誄可以補史傳之缺一也傳云親老家貧而  
誄則云母老子幼合之淵明命子詩於皇仁考淡焉虛上  
又云嗟余寡陋瞻望靡及顧慙華鬢負景隻立是淵明父  
亡在母之前至母之亡又當在彭澤解組之後誄所云遠  
維田生致親之義近悟毛子捧檄之懷初辭州府三命後



爲彭澤令是矣以此知淵明作令非僅爲三徑之資亦兼

存祿養之義此誄可以補史傳之缺二也宋書南史並云

延之在尋陽與淵明情款今考劉湛傳父柳亡於江州州

府江州治在尋陽

又按尋陽郡亦治此故傳又有郡將候

三命則知不特州辟淵明郡將亦曾有辟命可知

尋陽圖經淵明故宅在縣西南

柴桑里延之佐劉柳時所居當與淵明最近故誄云接閭

鄰舍宵 書憩非舟非駕也此誄可以補史傳之缺三矣

又傳云罷彭澤令在義熙二年其爲鎮軍建威參軍又在

作令之前則元興末義熙初也晉書安帝紀義熙元年二

月建威將軍劉懷肅討桓振斬之又劉敬宣傳與諸葛長

民破桓歆於芍陂遷建威將軍江州刺史鎮潯陽今攷長

民傳破桓歆在義熙以前與淵明筮仕之時恰合是淵明  
參建威軍事非劉敬宣卽劉懷肅不出二者無疑矣按敬

宣爲江州刺史又鎮潯陽則淵

明參敬宣軍尤近事實吾友莊述祖云劉裕爲鎮軍將

軍在元興三年爲壬寅歲而淵明之爲鎮軍參軍又在庚  
子以前明與劉裕無涉此又別傳可以補本傳之缺一也  
余又按淵明爲建威參軍時裕時正爲領軍將軍徐州刺  
史並非鎮軍此又晉宋二本紀可以正流傳之誣二也總  
之三隱逸傳及昭明所著皆有不能徵信處而南史誣妄  
尤甚此皆係淵明一生出處大節故詳悉列之如此而古  
人庶不受誣於後世乎

地理志沛郡有義城縣後漢屬九江魏晉屬淮南晉書桓

宣傳陶侃以其淮南部曲立義成郡按義當作鄴說文鄴臨淮徐地春秋傳曰徐鄴楚是也今左傳本作儀義儀鄴並同今故城在鳳陽府懷遠縣東北土人訛作拖城亦以聲近而轉也

今徽寧二府間多祀唐汪華以爲土穀之神其木主有稱越國公者有稱汪王者然吾以爲旣稱王卽當稱吳王以從其自號唐書高祖本紀所云汪華起新安杜伏威起淮南皆稱吳王是也本紀又言梅知巖據宣城不言其有僭號今宣城及寧國縣皆有知巖祠廟或稱魯公或稱魯王名號亦不畫一又本紀於武德六年三月梅知巖左難當降今方志于歸降年月亦前後不同自當以本紀爲正

鄺道元河水經引左丘明國語云華岳本一山當河河水過而曲行河神巨靈手盪腳蹋開而爲兩今掌足之跡尙存薛綜西京賦注亦引此文不言出左丘明而但云古語今攷外傳旣無此文且文法亦絕不相類按漢書藝文志春秋二十三家有新國語三十四篇劉向所分向素好采異說此條或卽向所掇拾道元誤認爲左丘明也楊雄河東賦云河靈矍踢掌華蹈襄蓋西漢時已有巨靈之說矣秦法斬首一名賜爵一級故因謂斬首爲級後人遂云官階中之加一級二級始於此非也說文級絲次第也鄭元禮記注級等次也因等次復借爲階級之級故級又作圾曲禮拾級聚足家語歷級遽登階不聚足皆是且左傳僖公

九年王使宰孔賜齊侯胙卽有加勞賜一級之文二十三  
年又云公子降拜稽首公降一級辭則官階之一級二級  
明非自秦始也

左傳成公十三年呂相絕秦云殄滅我費滑杜預注費滑  
滑國都於費今緱氏縣襄公十八年楚蔣子馮等帥師侵  
費滑亦卽此是費滑亦如周之陽樊晉之郟邵魯之須朐  
雖二名而實則一地然亦有僅稱費者郡國志滎陽有費  
澤當卽費邑之澤遂以得名至水經注渠水下引襄十八  
年楚蔣子馮公子格率銳師侵費而不言滑是費滑又若  
截然兩地矣或以爲道元引傳脫一滑字然滑下傳尙有  
胥靡等三邑道元亦不引而卽云右回梅山則非脫字可

知

梁書文苑劉昭傳載昭集後漢同異以注范蔚宗後漢書  
世稱博悉今昭後漢書集注蔚不傳惟司馬彪遂以續  
漢書十志稱劉昭注補人疑昭本傳止言注蔚宗而不  
言司馬彪續漢十志強屬之於昭而反沒其注補之實  
不知非也昭注范史時范志三十卷久已亡故取司馬氏  
續漢志以補之史文簡略故止云注范史耳南史所述亦  
與梁書同

王褒四子講德論今夫子閉門距躍李善注距躍不行也  
引應劭風俗通曰涉始於足足率長十寸十寸則尺一躍  
三尺法天地人再躍則步今攷左傳僖公二十八年魏犢

距躍三百曲躍三百杜預注百猶勵也無此義譌疑三百當爲三尺古人跳躍之法如此也襄公二十五年晏子枕尸殿而哭與三踊而出亦卽此義

左傳僖公二十三年齊桓公妻之傳下所稱姜氏是也劉向列女傳晉文公迎之以歸爲夫人然細校之列女傳所云亦未可盡信文公六年傳趙盾云杜祁以君故讓偯姑而上之以狄故讓季隗而已次之故班在四合以僖二十四年晉侯逆夫人嬴氏以歸三十三年傳上云文嬴請三帥下云夫人請之則是時晉文公夫人實文嬴也其二卽偯姑其三卽季隗而四卽杜祁無姜氏之位次也疑姜氏畱齊未歸否則文公復國之年姜氏或不幸已死均未可

知與其信列女傳不若信內傳吾友邵學士晉涵南江札記引列女傳云蓋以正室之禮待之蓋亦未深攷

水經注沂水下云漢武帝元朔二年封城陽共王子劉豨

爲侯國

指城陽之盧縣故注下云王莽更名之曰著善

按地理志城陽國有盧縣

而無盧縣又盧縣屬泰山郡不容此復有盧史記漢書二表豨所封又皆作雷皆云屬東海今攷東海郡亦無雷縣而有昌慮縣注曰侯國莽曰盧聚豨所封卽此耶以辟土侯壯所封在東海例之亦合史記表及水經注作共王子而漢書表又獨作共王弟亦不同

皇侃論語義疏頗采異說如齊景公章疏云夷齊反首陽山責身不食周粟惟食草木而已遼西合支縣祐家白張



石虎往蒲坂采材謂夷齊曰女不食周粟何食周草木夷齊聞言卽遂不食七日餓死今攷令支雖見於國語及周書王會解而遼西郡之名至秦始皇置且酈家白三字亦恐有脫誤則不若譙周古史攷之言爲可信矣劉峻廣絕交論云夷叔斃淑媛之言李善文選注引古史考云夷齊於首陽山采薇而食之野有婦人謂之曰子義不食周粟此亦周之草木也於是餓死疑侃所引不過六朝人之譏述而古史攷之著尙在漢末且以情事度之亦較義疏所引爲可信也

今歲自正月不雨至六月枯旱至數十州五六十年来所未有也吾友寧化伊秉綬守揚州以董仲舒春秋繁露求

雨之法行之未嘗不屢驗但未得深透耳以是知古法何嘗不可行於今或築壇鑿社向背陰陽法稍未合故應驗亦不至十分也且法亦何嘗初自董君董君爲春秋之學蓋三代以來吁嗟求雨之時盡當如此耳漢藝文志雜占家又有請雨止雨二十六卷不著姓名隋書經籍志復有董仲舒禱雨圖三卷書皆不傳然卽繁露十卷所言或可類推也吾願有牧民之責者平時先講求之以備倉猝則亦救時之良法耳伊君禱雨時余正居焦山故知之最稔山中老衲言今年大江水較往時減至八尺潮信亦減十分之五以致東南水國溝港絕流斗水十錢誠從來未有之災也

廣韻東部餽注引地理志曰東郡館名今考今本地理志東郡臨邑有涑廟字从水非食也玉篇亦不收餽字是當以涑字爲正說文涑水出發鳩山入於河與東郡之臨邑無涉惟濟水實經於此乃悟地理志涑字實涑之誤下小顏注沛亦濟水字也益可證涑當作沛郡國志云沛廟在臨邑水經注云臨邑有濟水祠是也因沛而誤作涑因涑又誤作餽真所謂字經三寫烏焉變馬矣廣韻集韻等皆然字書之不足信如此

孟子遷於負夏趙岐注負夏鳴條皆地名史記舜本紀就時於負夏集解引鄭元云負夏衛地而不言所在今考漢書地理志山陽郡瑕丘縣應劭曰瑕丘在西南酈道元云

瑕正魯邑春秋之負瑕哀公七年季康子伐邾囚諸負瑕是也衛公叔文子與蘧伯玉升瑕正卽此故鄭元皇甫謐等又以爲衛地也據此則負夏卽負瑕以聲近而轉耳尙書大傳又云舜販於頓正就時負夏頓正地理志屬東郡春秋時亦衛地與負瑕相去亦近

郭巨埋兒一事世俗所盛傳不知始出何書據太平御覽等所引以爲出劉向孝子圖今攷漢書藝文志及隋書經籍志並不載向此圖惟經籍志於孝經類載孝經內事圖二卷亦不言出劉向御覽八百十一卷又載有宋躬孝子傳所述郭巨事大類與孝經圖同宋躬唐書藝文志作宗躬其書載於王韶之孝子傳下則六朝時人也外此則于

寶搜神記李瀚蒙求等亦載巨此事大約皆本於孝子圖  
然亦有疑者劉向宋躬等亦云巨河內溫人而水經注濟  
水下云今巫山之上石室世謂之孝子堂圖經今名孝  
堂山卽郭巨石室也有郭巨畫象有齊隴東王威孝頌夫  
巨旣河內溫人何以石室又在平陰縣之巫山一可致疑

也又宋書孝義傳載有郭世道

南史孝義傳  
作郭世道

亦云家貧無

產業備力以養繼母婦產一男夫妻共議曰勤身供養力  
猶不足若養此兒則所費者大乃垂泣瘞之夫同爲孝子  
又同姓郭又同慮缺供養瘞兒何事之巧合若此二可疑  
也且卽以二孝子而論巨則讓產二千餘萬與兩弟而世  
道則家貧無產業巨所奉養者親母而世道則已屬繼母

巨埋兒得金一釜遂兼得養兒而世道之見竟生瘞而死以情理而論則世道之孝又加於巨數倍而何以巨事則人皆豔傳而世道之純孝世竟罕有知之者豈孝亦有幸不幸乎此三可疑也余意二郭事必有一附會惜古書之流傳者絕少無從證實之耳

或又云郭世道即郭巨以其巨孝故世呼之爲郭巨耳存考

陝西圖經李潤鎮在大荔縣西北而無里數今考北史魏安定王休傳子燮除華州刺史州時居李潤堡燮請移馮翊古城按馮翊郡舊治高陵此云古城蓋卽高陵故城在今縣西南者也高陵東北至同州所治大荔縣三百八十里大荔南至華陰一百六十里燮云采材華陰陸運七十

則馮翊古城至華陰縣境實止七十里北史又云馮翊東有李潤鎮是李潤在馮翊之東臨晉之西北不出百里自李潤鎮更西北則洛川縣界矣李潤前秦時與杏城已並爲重鎮圖經云始於後秦亦非也

左傳昭公七年晉侯夢黃熊入於寢門椈汲豕瑱語作平公夢赤熊晉語作黃熊韋昭注公夢熊似羆合賈逵注熊獸也觀之則平公所夢者實熊羆之熊釋文引又一說云三足鼈者非矣說文及字林亦云能熊屬

世說新語載鄭康成在馬融門下業成辭歸旣而融有禮樂皆東之歎恐元擅名而心忌焉元亦疑有追乃坐橋下在水上據屐融果轉逐之告左右曰元在土下水上而

據木此必死矣遂罷追元竟以得免人或謂融漢世大儒必不至此然余以爲世說所言必非僞造融既可爲梁冀草奏誣李固固以此遂致殺身又作西第頌以媚冀則其心死久矣忌才而害及門下士尙其小者耳范蔚宗以融及蔡邕傳合爲一卷然邕聞董卓之死尙歎息動色則與融合傳伯喈當亦羞之蔚宗傳贊乃云籍梁懷董名撓身毀是以一例論之不可謂平允矣

自周以後雖以諱事神然命名尙不甚相避父子同名者漢書王子侯表廣陵孝王子廣平侯名德嗣侯亦名德林邑王范陽邁死子咄代立復名陽邁北史安同傳同父子並名屈是也祖孫同名者鄭武公名掘突而其孫厲公亦



名突是也兄弟同名者三國吳顧雍傳雍次子名裕裴松  
之注引吳書雍母弟微子亦名裕是同祖兄弟同名也君  
臣同名者衛襄公名惡臣又有齊惡何休公羊注宋向戌  
與宋平公同名戌是也自唐以後始不復有然近日蕭山  
汪大令輝祖爲同姓名錄言明人劉江父子同名見明史  
劉榮傳此則又事之罕見者矣

論語非其鬼而祭之諂也夫諂豈特不可施於非其鬼卽  
應祭之鬼敬之則可諂之則不可推之而事神之道何莫  
不然余親見吾鄉腐儒乞人代製文昌二代名諱以立木  
土者夫以孔孟之聖高曾祖諱尙不盡傳家語係王肅僞  
子木金等語殊未可盡信卽如史記世家所譌所云孔父生  
言孔防叔生伯夏防叔伯夏亦皆字非名也況下於此者

乎近世諂神之道又別生一法必載籍窮而無可稽者卽云掘地得碑石云云周倉麥城之碑關索盤江之碣皆是也近人有爲關侯祖考名氏記云戊午解州有常平士于昌得碑於關侯故居之塔廟碑記侯之祖考兩世諱字生卒甲子云侯祖石盤公諱審字問之和帝永平二年庚寅生居解梁常平村寶池里子諱毅字道遠於桓帝延熹三年庚子六月二十四日生侯無論東漢尙無塔廟又既有諱有字矣而復云石盤公則必其別號也豈有東漢人而已有別號者乎至于支之外錯更不足辯此必係明時村學究所爲故所取諱字皆不出四子書中所與吾鄉腐儒製文昌以上三代名諱者又何以異夫諂神者欲神之喜

耳安有妄造神宗祖之名諱而能博神之喜者乎且神之  
俎豆一世俎豆千秋原不藉乎宗祖又豈藉宗祖之名諱  
方能震耀一世乎諂人不已而至諂鬼諂鬼不足復至諂  
神吾見今之無所不用其諂矣

秦法亦有不可盡非者如二十六年制曰朕聞太古有號  
無諡中古有號死而以行爲諡如此則子議父臣議君甚  
無謂自今已來除諡法朕爲始皇帝後世以計數二世三  
世至於萬世傳之無窮核此亦如質家之法以甲乙丙丁  
爲名未可爲非也其失惟在欲自一世二世至萬世耳若  
云以世數爲號至絕世卽止如漢光武所言日復一日安  
敢期十歲乎則大哉王言矣

余頗不喜人持輪回之說以爲卽有此理亦置之不論不  
議之列而已近時士大夫集之可傳者無過錢少詹大昕  
然尙惜其多輪回說一篇蓋輪回之說始於六朝盛於初  
唐宏明集廣宏明集等可見豈有爲漢儒之學者斤斤焉  
與唐人辨六道之終始十八獄之升降乎惜哉不作可也  
否則刪之可也

左傳僖公十年秦伯使洽至報問昭公二十一年洽州鳩  
曰釋文本並或作伶今攷成公九年鍾儀對曰伶人也詩  
疏及文選注卽引作伶是洽伶本一字可作洽亦可作冷  
也元和姓纂又云洽後譌爲冷後漢有冷壽光前趙錄有  
冷道皆是其後

水經注沔水下稱義熙十五年漢水出銅鐘十二枚刺史索邈奉送洛陽歸之宋公府今考義熙無十五年所云十五年實恭帝元熙元年也晉宋二紀及符瑞志亦不載此事又義熙十三年十二月裕已離洛陽南歸今隔二年而復云送鐘於洛陽亦非事實又是年正月裕已進公爵爲王而此尙云宋公亦非疑道元所采失實也

左傳昭公二十年盜殺衛侯之兄縶縶公羊穀梁作輒或云出公名輒靈公之孫與縶世數甚近不應同名不知公孟子名輒本以疾名與出公之名輒不同穀梁傳曰輒者何也曰兩足不能相過齊謂之縶楚謂之跣衛謂之輒玉篇廣韻輒足不相過是輒當作跣或作縶或作縶皆以聲

近而轉也詩載寔其尾毛傳寔踣也說文踣躓也又云蹇蹇足也與繫輒音義並通是公孟子名跣亦如慶集頭傾游販眼白春秋時卽隱疾爲名者極多無足怪也又說文取字引春秋傳云秦公子取取者其耳垂也是秦公子之名亦近取諸身與此同取輒古字並通

元和姓纂鍾朱微子之後桓公會孫伯宗仕晉生州犁仕楚食采鍾離因氏焉子孫或姓鍾氏楚有鍾儀鍾建今攷鍾儀尙在州犁之先何得以州犁之采邑爲氏且廣韻引世本云鍾離氏與秦同祖其後因封爲姓是鍾離氏又不盡微子之後矣林寶雜采唐代譜牒多有不足據者此其一也地理志九江郡鍾離應劭曰鍾離子國疑鍾離蓋以

國氏也

趙岐孟子注王豹衛之善謳者蓋岐亦無別據以處於淇故謂之爲衛人耳今攷淇水自廣宗縣以下已與齊接界則淇非盡屬衛也左傳哀公六年囚王豹於句瀆之巨杜注云景公嬖臣則孟子所云王豹或卽此

鄒衍以九州外有大九州其說已不經矣釋氏更推爲荒誕無稽之說云大千者謂一三千界爲小千世界千小十世界爲中千世界千中千世界爲大千世界是更拾衍之緒餘而不知其理之必不可通矣吾固謂西方之數皆吾儒之末流好爲邪說者倡之釋氏不足責衍之罪則亦聖人所必誅也至云釋迦佛正法住世五百年象法一千年

末法一萬年則又竊大戴禮孔子對宰我之問黃帝而云  
生而人得其利百年死而人畏其神百年亡而人用其教  
百年更十倍百倍之以與吾儒爭勝又不足一哂矣

戰國齊策齊取淄鼠魏取伊是高誘注淄鼠伊是皆趙邑  
也按伊是卽上黨郡之伊氏以音近而轉

漢書地理志京兆藍田云山出美玉然自漢以來未聞有  
在藍田采玉者惟北史李先傳子預帶馮翊太守罷郡遂  
居長安羨古人餐玉法乃採訪藍田躬往攻掘得若環璧  
雜器形者大小百餘頗有蠹黑者亦篋盛以還觀之皆光  
潤可玩是藍田之產玉信而有徵矣然傳又云預時聞之  
者更求玉於故處皆無所見是預亦適逢其會耳余以爲



不然卽如東南產銅之山不下數十座自吳王濞諸人後  
豫章鄣郡諸山不聞更有產銅致富者蓋地力有消旺非  
產銅之山終古皆出銅不竭也藍田之玉亦視此而已矣  
余官滇黔時其地產金及產鉛錫之山亦頗多然力乏則  
須封閉不能源源不竭也合浦郡產珠亦然官貪則珠亦  
移徙卽此道耳孰云地不愛寶哉

曉讀書齋四錄卷上終

曉讀書齋四錄卷下

陽湖洪亮吉著

廣雅襍裔方外旌表也王給事念孫疏證云暴與襍聲近而義同今按襍與暴不可云義同亦不當引左傳襄三十年不敢暴露以證此襍字蓋暴露之暴从日字生義與孟子之一暴十寒同說文暴晞也是矣若表襍之襍从衣暴聲則暴已作聲而非義矣衣故有表裏之殊曹大家注幽通賦高誘注呂覽忠廉篇並云襍表也毛詩素衣朱襍襍亦當訓从表故說文襍字下引此詩易林亦云衣素表朱可證

元和姓纂可補正者極多如侍其一姓云漢廣野君酈食

其元孫賜以食其爲氏不知六國時已先有侍其曰季一姓云齊公子曰季之後不知晉亦有曰季以采邑爲氏是婁等複姓下云南燕有徐州刺史是婁盧不知東魏又有揚州刺史是云寶今北史等皆脫云字从廣韻補正按三國吳志是儀傳云孔融嘲儀氏字民無上可改爲是乃遂改焉然亦有未可盡信者三國後有是復有氏則是姓亦未全改新唐書奸臣柳燦傳有氏叔琮姓苑及集韻等書亦並云氏姓也

南宋人不甚通字學如王深寧可云該博矣其著困學記聞小學內引爾雅槩茗茶一條云注言早采者爲茶晚取者爲茗說文茗茶芽也今攷茗字玉篇始有之云茗茗芽

廣韻茗草也若深寧所引說文茗茶芽也係徐鉉新附字  
何得以爲說文乎今考莛字亦說文所無莛茗皆始見玉  
篇云莛茶葉老者廣韻莛茗草

蘇文忠係北宋人下語卽有分寸所云茗飲出近世

是也

說苑君道篇晏子沒十有七年景公飲諸大夫酒公射出  
質云云按景公以魯哀公五年卒此飲諸大夫酒當又在  
五年以前今攷晏子昭公二十六年尙見左傳則其卒當  
在定公初年又攷晏桓子卒在魯襄十七年其老已稱晏  
子爲大夫則是年以前晏子當已服官政則年應在二十  
以外三十以內也自襄十七年至定公初已及五十年是  
晏子年亦最老壽與史記晏子本傳事齊靈公莊公景公

之言亦合惟本傳不載晏子卒之歲月故因校說苑備及之

史記貨殖列傳范蠡變名易姓適齊爲鴟夷子皮小司馬引韓子曰鴟夷子皮事田成子按說苑臣術篇陳成子謂鴟夷子皮云云指武篇鴟夷子皮爲田成子謀宰我云云則子皮事成子之說不妄矣今攷越入吳在魯哀十三年後一年田常弑簡公又五年而齊國之政皆歸田常常之代齊蓋亦鴟夷子皮之力居多也十年之中佐越滅吳復佐田氏代齊又皆功成不居引身而退蠡真人傑也哉

泉水詩出宿于于飲餞于言隋書州郡志邢州內正縣有于言山衛邢同姓之國無嫁女之禮前人以爲嫁於邢旁

小國亦嫌無據今以泉水一章道理核之首章言泉水及淇則思衛而以衛地起興也衛女既於所嫁之國思歸其道路所經自必由近及遠次章曰泲曰禰夫泲水在齊境內居多漢書地理志西有濟南平原皆齊分齊策齊有清濟濁河之固是矣匏有苦葉詩有瀾濟盈毛傳瀾深水也瀾當卽泲旁之深水故地卽以水名又巨洋河一名胸瀾河歷臨朐劇壽光平濤諸縣與泲水亦近道元所云巨洋河一名胸瀾者也疑衛女所嫁卽齊國故次章卽以所嫁之國境內地言之三章言宿于干餞于言則道路所經之國地也四章言肥泉言須言曹曹漕則已至衛國之境內矣似此分晰覺泉水四章頭緒始清雖不敢卽以爲是或

尙可備一說耳

說苑說叢一篇多三代以來賢聖相傳之格言周秦諸子率多引之然亦非周秦諸子所自造也如衣食足知榮辱倉廩實知禮義管子引之唇亡齒寒宮之奇引之如日月之蝕何損於明士貞子引之蓬生麻中不扶自直按亦見大戴禮及荀子白沙入泥與之皆黑逐魚者濡逐獸者驅文子引之世混濁而我獨清衆人皆醉而我獨醒初沐者必振冠新浴者必振衣屈子引之君子有終身之憂而無一朝之患君子不以其所不愛及其所愛人知糞田而莫知糞心孟子引之敗軍之將不可言勇李左車引之天道無親常與善人司馬遷引之寸而度之至丈必差銖而稱



之至石必過枚乘引之一死一生乃知交情一貧一富乃知交態一貴一賤交情乃見翟廷尉引之修身者知之府也以下十句亦司馬遷引之他如食其口而百節肥灌其本而枝葉茂御者使人恭射者使人端此例凡數十句見於呂覽淮南子者又不一而足以上諸條引用者或以爲古辭或以爲舊聞或以爲諺語類皆賢聖相傳之格言也故吾以爲周秦諸子之外惟淮南說苑最多前人舊說學者所宜時時尋覽者矣

論語子畏於匡何晏集解及史記孔子世家皆止云匡人惟說苑韓詩外傳及王肅所造家語以爲匡簡子奪伯氏駢邑三百孔安國注及史記亦止云伯氏齊大夫獨皇侃

論語義疏以爲伯氏名偃駢邑者偃所食采地皆當有所本而今無攷則古書之亡者多矣

記九州地理爾雅釋地不如周官職方周官職方不如尙書禹貢卽以揚州論禹貢曰淮海惟揚州必據淮海並言者傳所云北距淮南距海也職方曰東南曰揚州則據周所建都之地而言故云東南釋地曰江南曰揚州則北距淮南距海之地獨非揚州乎卽以漢書地理志而論廬江九江又皆揚州境內江以北之地也釋地又曰漢南曰荊州而南陽江夏夏郡又實在漢北是不若職方正南曰荊州之爲該括矣禹貢則曰荆及衡陽惟荊州舉南北兩山而荊州之界畫已盡此四字吾故曰志地理者當以禹貢

爲法山水終古不變則州界亦終古不易矣釋地齊曰營州說苑則云齊曰青州一則據殷制一則舉漢制也

外傳孔子曰僬僥氏長三尺短之至也長者不過十之數之極也是人卽極長亦不過以三丈爲度北史高季式傳范陽盧曹自薊入海島得長人骨以覆體爲馬阜脰長丈六尺以爲二袖是又較汪芒氏之長過之矣天地之大無所不有信然

玉篇言部有誓云扶件切俗辯字廣韻及董

**唐書釋音**

並同按新唐書牛仙客傳有康誓卽係此字攷北史江式傳俗學鄙習復如虛造乃曰追來爲歸巧言爲辨乃悟辨字俗旣省作誓誓又訛作誓一字三寫遂至不可復識攷

北史文苑傳柳警字願言卽用俗字爲名然言上尙作巧蓋字至唐時始又訛作習耳式傳又云小兎爲魏神蟲爲蠶今魏字亦見玉篇廣韻魏兎子也類篇又訛作兗云江東呼兎子爲魏或作兗皆展轉失其本義矣追來爲歸神蟲爲蠶字書亦皆錄入本字下吾故云六書之乖皆自南北朝始餘已見北魏金石跋不贅

江式傳又云魏初博士清河張揖著埤蒼廣雅古今字詁然其字詁方之許篇古今體用或得或失今攷唐書藝文志小學類載張揖廣雅四卷又埤蒼三卷三蒼訓詁三卷雜字一卷古文字訓二卷共五種而無古今字詁惟顏之推家訓李善文選注等屢引之則字詁一書又在五種之

外矣六書至漢末揖實集其大成又非呂忱呂靜等所能及也

又式傳所引小學書十四種唐書藝文志已佚其四能流傳至今者又祇有六耳式傳有通俗文次方言下其爲服虔所著無疑唐書藝文志祇有李虔續通俗文則服虔書已亡可知唐徐堅初學記釋元應一切經音義等尙時引服書則通俗文亡當在北宋初也又按式上此表在魏延昌三年於梁爲天監十三年南史阮孝緒傳以天監十二年爲祕書監傅昭所薦正與江式同時今式表列及通俗文而阮孝緒晉中經簿及七志無之蓋服氏之學盛行於河北或通俗文亦流傳不至江左未可知李延壽儒林傳

所述可證矣云春秋左傳江左則杜元凱河洛則服子慎是也

南史顏協在文學傳其子顏之推在北史文苑傳皆云琅邪臨沂人按琅邪係東晉成帝時僑郡臨沂亦僑縣屬琅邪今琅邪故僑郡在今句容縣北有琅邪鄉卽其地臨沂故僑縣城在今上元縣東北三十里盧學士文弼近今顏氏家訓凡例據方志云黃門九世祖從晉元帝渡江今江寧顏家巷其舊居也以爲當作江寧人不知琅邪僑郡縣今亦皆屬江寧不必改也元和姓纂等書顏氏本貫琅邪晉永嘉過江居丹陽是顏氏本自江北琅邪渡江又居僑郡之琅邪耳景定建康志亦不載江寧有顏家巷方志蓋

據觀我生賦原注顏家巷在長干與下句展白下以流連  
白下長干皆在今江寧縣境至晉書孝友傳顏含卽協七  
世祖傳云琅邪莘人莘蓋又華字之誤也

水經沂水過下邳縣西南入於泗道元注云沂水於下邳  
縣北西流分爲二水一水於城北西南入泗一水逕城東  
屈從縣南亦注泗謂之小沂水攷今沂水至邳州東分爲  
二支西南流入運河其正流入駱馬湖尙與道元所說同  
按北史薛胄傳先是兗州城東沂泗二水合而南流汎濫  
大澤中胄遂積石堰之決令西注陂澤盡爲良田夫云在  
兗州城東與泗水合則在蓋縣以下臨沂以上矣胄爲兗  
州刺史雖已在道元注水經之後然何以今日沂水入泗

尚與道元所說同蓋沂與泗二水相距本甚近或隋開皇  
中暫時合流自崑築堰以後沂水仍歸故道也又兖州圖  
經西沂水在兖州府城東與泗水合則崑傳或專指西沂  
水也

顏氏家訓風操篇云蒼頡篇有脩字訓詁云痛而諱也音  
羽罪反今北人痛則呼之聲類音於耒反按既有羽罪於  
耒二反則字不當有爻音疑脩字爲脩字傳寫之誤今北  
俗痛苦甚尙呼阿脩讀若消或尙與古同也左傳昭公三  
年而或燠休之服虔注云燠休痛其痛而念之若今時小  
兒痛父母以口就之曰燠休代其痛也阿脩卽燠休之轉

聲



漢儒許叔重王叔師皆楚人故其注淮南王書楚辭等喜引楚言如淮南注所云楚人以厭爲昧楚人謂扇曰箠楚人謂豕爲豨楚人謂牢爲雷楚人謂刃頓爲銖楚人謂袍爲袷褐大布楚人謂倨爲倦楚人謂恨不得爲桎治塵楚人謂之堞香楚人謂之薰熈楚人謂蹟爲蹟又云蹟楚人謂蹟也楚人名布爲曹菽莠楚人謂之蒿楚人謂中庭爲壇戶限楚人謂之麟楚人謂士爲武楚人謂精進爲精搖楚人謂澤濁爲眇挈楚人謂水暴溢曰濼雖半已清入高誘注中然大略皆許注也其在說文者如楚人以卜問吉凶爲𦉳東楚名缶曰留南楚謂盼曰睇是矣楚辭章句所引如楚人名憇曰憑羌楚人語辭也楚人名住曰僚楚人

名轉曰邇楚人謂相調笑曰哈楚人謂失志悵然住立謂  
控僚也楚人名園曰轉楚人名結草折竹以下曰筭卉百  
草總名楚人語也楚人名巫爲靈子劍楚人名曰長鍊楚  
人名澗曰潭楚人名冬生草曰宿莽楚人編竹木曰汙楚  
人名里曰閤楚人名羹敗曰爽楚人名池澤中曰瀛楚人  
名澤爲夢中皆是至若劉逵吳都賦注楚人謂百艸爲卉  
楚謂欺爲眠妄曰僂劣楚謂搏曰扶呂忱字林張湛列子  
注釋元應一切經音義玉篇廣韻集韻所引楚人名蔭曰  
芟梟楚人謂之服鳥楚人謂之蠹蟻之衣南楚人謂雞曰  
長沙人謂禾二把爲稿陳楚人謂鹽池爲鹽統楚謂之  
五兩荊州人呼渡津船爲潢楚人呼麻曰膠楚謂大船曰

舂楚人謂多曰夥楚人呼妹曰媚楚人謂食麥餽曰餅楚人謂跳躍曰蹠楚人名深水曰潭南楚呼父爲宓楚謂南楚名相椎吳楚之間名火滅爲燿楚謂言不通利謂之饜吃楚郢以南蟻土謂之垤楚人謂相調笑曰哈楚人名火曰燥楚捶人卽痛因名楚痛吳楚謂瞋目顧視曰眦楚人謂媼爲脫乳楚人謂躓仆曰躓楚人謂襦曰襦南楚呼食麥粥曰飶楚人謂幃曰幃東楚謂橋曰圮楚人呼母之母曰媼楚謂搏擊曰攢楚謂筏上居曰篤楚謂擊爲總楚人謂跳躍曰蹠說文楚謂兒泣不止曰噉咷南陽謂大呼曰噉楚謂疾行爲逞之類不可枚舉外如揚子雲方言本采方國之言故此不更錄大抵楚地最廣故方音亦惟楚地

最多今彙而錄之亦古人審音知政之一助也

他如五方之音除方言所采外說文所引秦謂蟬蛻曰蛩  
棲秦名爲握椽秦謂民爲黔首謂黑色也字統秦謂陵阪

曰阨

廣韻引

廣韻關西呼輪曰轆你秦人呼旁人之稱秦人

謂饋喪家食爲糜秦人呼蘿蔔爲菘字林秦人謂蚊爲蝻  
蛤秦曰牡礪秦人謂坑曰塹謂阪曰阨秦人呼過爲繩說  
文秦晉謂兒泣下不止曰嗟此秦音也說文齊謂芋爲菑

釋名引齊魯間謂四齒杷爲櫨蒼頡篇齊郡謂漱曰欬

一切

經音義引

郭璞爾雅注梳齊人謂之攀今青州人呼戴爲蛄蜥

釋文齊人謂火曰燬廣韻齊人謂椎爲柎揆齊人謂屋棟  
曰桴齊人謂蠹爲賁衆經音義齊人謂醬咋爲齏集韻齊

人呼母或作夔東齊謂磨曰礫硯考工記注齊人之言終古猶言常也說文宋齊謂泣不止曰啞此齊音也字林引北燕人謂蚘蚰爲蚘蚘北燕人謂蚘蚘曰蟻蚘此北燕音也字林吳人謂積土曰隙集韻引晉春秋吳人謂中州人爲僇人張湛列子注吳人呼瞬目爲眴目衆經音義引吳人以步屈名桑闔吳人名掣電爲礮礮廣韻集韻引吳人辨鞠曰鞠江東呼蚌長而狹者謂之蠃吳人呼父爲著吳人云刺木曰杵吳人謂挈鐵曰鑿江東呼蓐爲苦蕒吳楚呼蠓爲寒蠓吳人呼哺兒曰飴吳人云牽亦爲蠃吳人謂鋸曰鉞蠃吳會間音哭吳人謂呼曰咬吳人謂赤子爲涇孖吳人謂蠶曲曰籩吳人謂醉柚曰陵吳俗謂灰曰焮吳

人謂育蠶竹器曰筐吳人爲盛衣櫝曰廡吳人謂逆剝木曰臙吳人謂簞曰笙吳俗謂好女曰娃吳俗謂刀柄人處曰鐔吳人呼哺兒爲餵吳俗謂草木萌曰穉吳人謂虹曰雩吳俗呼母曰媵吳俗謂蠶槌曰袋吳俗謂石有痕曰硯吳俗以草木葉糞田曰蔞吳人謂衣曰襍吳人云牽亦曰捺吳俗謂纒絮曰綳吳俗謂熬米爲餌曰媵吳俗謂籩曰籩此吳音也

漢世之盛稱東南一尉西北一候東南一尉則會稽郡東部都尉是也治章安縣三國吳太平二年又以會稽東部都尉置臨海郡是矣西北一候孟康揚雄傳注云敦煌玉門關雖有候亦兼置都尉矣北史尉景傳秦漢置尉候官其先有居此職者因以爲氏據此則一尉一候又不始于

漢承秦制也

外傳晉語夷鼓彤魚氏之甥也韋昭注彤魚國名按彤魚國未知所在今攷竹書紀年荀瑤伐中山取窮魚之丘彤窮音同窮魚當卽彤魚是彤魚國在中山境矣水經注巨馬河下涑水又東北徑西射魚城又徑東射魚城道元引竹書窮魚之丘云窮射字相類據此則彤之爲窮以音同而轉窮之爲射又以字近而訛也今射魚又作賽魚山西圖經平定州唐受州故城在州西北三十里卽賽魚城也余以甲辰四月過之城尙有遺址蓋實形勢之地矣射之爲賽又以音近而轉

春秋時魯國境內之水如濟汶洙泗淄沂洹漆杜預略已

詮解惟澗洮潛三水皆闕而不詳今采說文水經注并參以已見補之左傳襄十九年取邾田自澗水說文澗水在魯水經注泗水下去澗水出東海合鄉縣其水西南流入邾哀二年季孫斯伐邾取澗東田及沂西田是也澗水又徑魯國鄒山而西南流澗水又西南徑蕃縣故城南又西徑薛縣故城北澗水又西徑仲虺城北京相璠云澗水首受蕃縣西注山陽湖陸又云南梁水自枝渠西南徑魯國蕃縣故城東俗以南鄒於澗亦謂之西澗水是澗水所徑凡邾魯薛三國并有東澗西澗矣春秋莊三十七年傳分曹地自洮以南水經注今鄆城西南五十里有姚城或謂之洮也圖經今洮城在濮州南按春秋莊十八年公追戎于



濟西服虔注濟西曹地京相璠云濟水自鉅野至濟北是魯與曹以濟水爲界此則洸水在濟西北莊公與杞伯姬會當在此地矣春秋隱二年公會戎于潛水經注濟濱自濟陽縣故城南東徑戎城北春秋公會戎于潛卽此據此則戎城在濟水上矣夫濟水本潛而復出故濟水亦可名潛是潛卽濟水矣蓋潯水近沂與邾國界洸水近濟與曹國界洹水在晉魯之間與晉國界淄水在齊魯之間與齊國界卽以水道攷之而魯之四境已可昭然指諸掌矣水以洸名者凡五見于經者二昭元年傳宣汾洸晉國之洸也莊二十七年公會杞伯姬于洸曹魯之洸也見于史傳者三漢書地理志隴西郡臨洸原注原水出西羌中北

至枹罕東入河秦國之洮也零陵郡有洮陽縣漢書高祖紀漢別將擊布軍 水東北徐廣曰洮在江淮間羅含湖中記零陵有洮水楚國之洮也圖經引周處風土記陽羨西北有洮湖一名長蕩湖建康志長蕩湖在溧陽縣北五十三里舊名洮湖吳國之洮也

新唐書令狐德棻傳先世爲敦煌望族宰相世系表令狐氏出自姬姓魏顛以獲秦將杜回功別封令狐按北史令狐整傳整遠祖漢建威將軍邁不爲王莽屈其子稱避地河右故周文稱之云云世系表則云邁與翟義起兵討王莽兵敗死之與北史所言微異今考漢地理志河東郡猗氏春秋時令狐也魏顛子魏頡食采于令狐故國語又稱

爲令狐文子是令狐之得姓以采地而名左傳僖公二十四年濟河取令狐曰衰是矣

越絕書計倪內經甲貨之戶曰黍爲上物賈七十乙貨之戶曰黍爲中物石六十丙貨之戶曰赤豆爲下物石五十丁貨之戶曰稻粟令爲上種石四十戊貨之戶曰賚爲中物石三十己貨之戶曰大豆爲下物石二十庚貨之戶曰穞比疏食故無賈辛貨之戶曰果比疏食無賈壬癸無貨乃悟吳越之語食之最下者爲庚辛壬癸公孫有山氏將以庚癸之食給申叔儀所云蠶則有之也但云庚癸者舉上下以概其中耳杜注庚西方主穀癸北方主水殊屬曲說况又無所本耶

吳越備史天寶十一年立晉分水令朱徹廟于新登縣封  
徹通靈侯按分水置縣始于唐晉安得有分水縣耶

左傳宣公三年王孫滿對楚子云成王定鼎于郊鄆說文

鄆河南縣直城門官陌地也漢書地理志河南故郊鄆地

帝王世紀王城西有郊鄆陌是郊鄆係地名又陌名未有

以爲山者以郊爲山始于京相璠

見水經  
洛水下

然尙分別言之

曰郊山名鄆地名隋書地理志亦同至宋邵伯溫聞見前  
錄始盡以郊鄆爲山名云洛中形勝郊鄆山在西邙山在  
北不知二字从邑非山名也樂史寰宇記又云邙山卽郊  
山之別名是又并二山爲一更誤

新唐書韓愈傳鄆州南陽人不誤河南圖經及新舊書地

理志唐武德三年改南陽郡置宛州貞觀八年宛州廢屬

鄧州終唐之世南陽縣皆屬鄧州宋邵伯溫聞見後錄反

引史記白起攻南陽徐廣注云此南陽河內修武也而以

爲愈係修武人誤甚矣今考南陽有三有晉之南陽有齊

之南陽有楚之南陽左傳晉于是始啟南陽杜預注在晉

山南河北蓋山南爲陽修武溫二縣皆在太行山之南故

以南陽爲名此晉之南陽也孟子一戰勝齊遂有南陽趙

岐泮山南曰陽岱山之南陽也公羊傳齊桓公使高子將南

陽之甲立僖公而城魯何休注南陽齊下邑卽此此齊之

南陽也是二南陽皆以在山之南得名然秦漢以來皆不

以南陽名縣以南陽名縣者實惟鄧州之南陽耳地理沿

革表南陽縣在周爲申國春秋楚宛邑漢置宛縣後魏分  
置上陌縣周省宛縣入上陌改曰上苑隋開皇初始改南  
陽縣唐因之南陽郡以在國都正南陽也故名南陽縣名  
又取之于郡耳此楚之南陽也聞見錄乃欲以不誤爲誤  
何哉

又按今南陽府南陽縣鄉賢祠祀唐韓思彥韓琬而不及  
愈亦當補入

史記鄭世家秦繆公使三將將兵欲襲鄭 鄭文公之  
卒也鄭司城繒賀以鄭情賣之秦兵故來云云按氏族志  
及廣韻繒得姓始于漢功臣表之繒賀今鄭之繒賀又在  
漢功臣表之前四百餘年則繒氏得姓不自漢始也然二

人者同姓同名又皆見史記恐有一誤

談空語怪天堂地獄之說皆起于戰國之時而離騷經爲尤甚遠遊篇談空之始也天問篇語怪之始也招魂大招諸篇九天八柱昆侖縣圃長人土伯崦嵫山劍樹天堂地獄之始也外此則莊列鄒衍諸人雖各不相謀又皆可揚其波而助其饑蓋三代之末禮教衰而邪說起漸背先王之軌法已開道釋之源流未必非屈子諸人階之厲也

論語羿善射奭盪舟王逸楚詞章句引此奭作澆蓋南宮適當日連取夏時羿澆事作譬非堯子丹朱可知故云皆不得其死然若丹朱非不得其死者

韓非子顯學篇孔子之後儒分爲八有漆雕氏之儒下云

漆雕之議不色撓不目逃則孟子所云北宮黝之養勇不  
膚撓不目逃者漆雕氏之學也

道經微明篇將欲廢之必固興之將欲奪之必固與之今  
攷任章之對魏桓子曰周書云將欲敗之必姑輔之將欲  
取之必姑與之其意略同唐太宗所引亦同惟姑字作固  
是老子亦述昔言非自創也論語孔子之言曰述而不作  
信而好古竊比于我老彭信哉

其進銳者其退速老子之言而孟子述之見後漢書李固  
傳謝承漢書以爲出于孟子非也

吳志諸葛恪傳曰陽長胡伉按漢及三國皆無白陽縣舊  
陽當屬丹陽之誤也



葛嶧山在東海郡下邳縣漢書地理志古文以爲嶧陽按爾雅釋山屬者嶧郭璞注言駱驛相連屬劉昭續漢志注引郭璞又云釋山純石積構連屬是嶧字可作繹亦可作驛義訓並同惟胡三省通鑑注云鄒山多石穴土人謂穴爲嶧今攷字書無有以嶧爲穴者又說文穴土室也非石山可知胡注云云恐因宋書遽藏入穴之文附會成之非嶧字義訓也

魯山城以魯山而名元和郡縣志以魯山爲卽大別山非也按南史蕭衍舉兵東下東昏侯敕竟陵太子房僧寄守魯山又衍築漢口城以守魯山以迄陳天嘉中王琳據江鄂諸州附于蕭齊人守魯山又唐武德四年蕭銑鄂州刺

史雷長穎以魯山來降是唐以前無有以魯山爲大別山者誤實自李吉甫始

唐道釋皆有一切經釋教錄齊沙門釋道惠爲一切經音唐釋元應撰一切經音義等此一切釋經也宋錢易南部新書云唐天寶十載寫一切道經五本賜諸觀此一切道經也

俗語皆有所本北齊書高敖曹與劉貴同治兵于虎牢外自治河役夫多溺死貴一錢漢隨之死貴係鮮卑種蓋言漢人之賤也然貴語亦甚典漢書灌夫傳灌罵賢曰平生毀程不識不直一錢則一錢漢語蓋本此一錢漢不直一錢皆輕人之語也

隋蕭吉五行大義五卷蓋作于大業唐宋藝文志及藏書家皆不著錄近日本國人刻佚存叢書始見之歸安許主事宗彥復校刊行世今按隋書吉傳在藝術中觀其開皇中所對隋文帝之言及仁壽二年爲獨孤皇后擇葬地類皆借陰陽術數以貢其諛去京房李尋之徒遠矣其所徵引爲他書所無者亦僅十之一二

釋氏出于道家故古人皆言道釋唐書天授二年四月制詔以釋教開革命之階升於道教之上今人言二氏者皆言釋道或起于此然魏收撰後魏書已有釋老志則道先于釋又不知何時改也

唐制雖同一翰林院供奉而階級懸絕如唐書天寶十三

載以刑部尚書張均及弟太常卿均爲翰林供奉皆正三品也文藝李白傳召見麟德殿卽命白供奉翰林院則始釋褐卽爲翰林供奉矣他若僧道書畫琴碁數術皆得供奉翰林蓋供奉非官也唐之翰林供奉亦如漢之金馬門待詔而已一藝之士皆得爲之故張說陸堅張九齡徐安貞及均均等或爲翰林待詔或爲翰林供奉其實一也代宗泰定元年命左僕射裴冕等十三人于集賢殿待制事亦同

又按代宗時徵白爲右拾遺蓋白至此時始拜官知前此之供奉翰林尙非實職也

晉書載記慕容廆傳秦漢之際爲匈奴所敗分保鮮卑山因以爲號後漢書鮮卑傳亦同是秦漢之際始有鮮卑之稱矣今攷晉語叔向謂趙文子曰昔成王盟諸侯于岐陽

楚爲荆蠻置茅蕝設望表與鮮牟守燎故不與盟韋昭注  
鮮牟東夷國按鮮牟一本作鮮卑則周初已有鮮卑之稱  
不始于秦漢也

齊庫旣焚晏嬰入賀唐河東碑書記李襲吉所云胡身之  
注引韓詩外傳晉平公藏臺火以當之非也